



**Ika-Kawhaag-Duha nga Dominggo
sa Kasarangang Panahon
Agosto 31, 2014**

Ma-Dominggong Tamdanang Liturhikal alang sa Simbahan sa Kabus sa Diwa sa Bag-ong Ebanghelisasyon

Ang Simbahan sa Kabus, Apinaagi sa Gagmayng Simbahanong Katilingban, nag-aninaw sa dalan sa Krus isip Lawas ni Kristo pinaagi sa mainit ug romantikong pakiglambigit sa Dios ug sa bug-os nga pagsinati sa pinakalawom nga panginahanglan sa tawo!

Uban sa PCP-II, magpadayon kita sa pagpamalandong sa gasa sa Pagtoo nga gihatag sa Dios kanato pinaagi ni Jesus. Ang PKP-II nag-ingon:

“2. Ang Pagpuyo sa Pagtuo

2.a) Pag-ampo ug Pagsimba

(76) Ang pag-ampo mahimo usab nga pag-ampo sa pundok sa sama sa gibuhad sa lain-laing mga pundok nga nag-ampo alirong sa bibliya, mga pundok karismatiko, pag-rosaryo sa mga managsilingan ug uban pang mga susama nga mga grupo, ang mga grupo sa pag-ampo sa Barangay Sang Birhen ug sa mga Cursillos. Apan kon tinagsa-tagsa man o diha sa usa ka pundok, ang pag-ampo kinahanglan gayud nga magpabilin sa iyang kinaiyahan ingon nga usa ka personal nga pakig-istoryahanay uban sa Dios

nga nahigugma kanato. Ang maong panag-istoryahanay mahimo diha sa kahilom ug sa pag-inusara sa usa ka kasingkasing o diha sa makahuluganon nga pagsugid ug matngong pagsubli sa mga pormula sa pag-ampo. Apan ang usa ka mapasagaron ug mekanikal nga pagbalik-balik sa mga pulong wala maghimaya sa Dios, ni magpabalaan sa mga tawo.

(77) Ang atong kinabuhi sa pagsimba ug ang atong kinabuhi sa pag-ampo nakakaplag sa ilang tinubdan ug kinatumyan diha sa sagrado nga liturhiya, nga mao ang opisyal nga publikong pagsimba sa Kristohanong katilingaban, nga nasentro sa Eukaristiya ug sa uban pang mga sakramento. Dinhi, ang Kristohanong katilingban nagatigum palibot sa Ginoo kansang presensya tinuod anaa sa tigom, anaa diha sa ministro, diha sa mga pulong sa kasulatan nga gibasa diha sa Simbahan ug, labing tataw, sa Eukaristiya diha sa Iyang kaugalingong lawas ug dugo (SC no. 7). Sa Liturhiya kita nagapundok ug naga-ampo sa ngalan sa atong Ginoo. Pinaagi kaniya kita adunay ‘agianan diha sa usa ka Espiritu ngadto sa Amahan.’ Dinhi atong matagboan pinaagi sa pagtuo ang Ginoo kinsa gitugyanan nato sa atong mga kinabuhi. ■

RITO SA PAGSUGOD

Malooy ka kanako, O Ginoo, kay ako nagatu-aw kanimo sa tibook adlaw. O Ginoo, ikaw mao ang maayo ug mapasayloon, puno sa kalooy ngadto sa tanan nga nagatawag kanimo.

P: Sa ngalan sa Amahan ug sa Anak ug sa Espiritu Santo.

K: *Amen.*

P: Ang Ginoo maanaa kaninyo.

K: *Maanaa usab kanimo.*

Pasiuna ug Pag-abi-abi

Maayong pag-abot dinhi sa kasaulogan sa gugma ug kinabuhi sa Diyos nga manggihatagong gipaambit niya kanatong tanan ug sa tanang binuhat. Karon, ang Simbahan isip Lawas ni Kristo nagpahinumdom kanato bahin sa pagdapit sa Krus: ang mainit ug romantikong pakiglambigit sa Dios diha sa halawom nga pagsinati ug sa pagtubag sa pinakalawom nga panginahanglan sa tawo.

Akto sa Paghinulsol

P: Mga minahal kong mga igsoon: andamon karon nato ang atong mga kaugalingon sa pagsaulog niining sakramento pinaagi sa pagpangamuyo sa kalooy ug pasaylo sa Diyos kay siya mao ang atong Dios sa gugma ug kalooy .

K: *Ginoo, malooy ka.*

P: Ginoong Jesus, ikaw mitawag kanamo sa paghigugma kanimo ug sa usag usa. Ginoo, malooy ka.

K: *Kristo, malooy ka.*

P: Ginoong Jesus, ikaw mitawag kanamo sa pagpas-an sa krus sa katilingbanong hustisya ug kaakuhan. Kristo, malooy ka.

K: *Ginoo, malooy ka.*

P: Ginoong Jesus, ikaw mitawag kanamo nga mahimong usa ka katilingban, ang Lawas ni Kristo. Ginoo, malooy ka.

K: *Ginoo, malooy ka.*

P: Kaloy-an unta kita sa Dios nga makagagahum sa tanan ug pasayloon ang atong mga sala, dad-on unta kita niya ngadto sa kinabuhing dayon.

K: *Amen.*

Himaya sa Diyos didto sa langit...

Kolekta

P: Mag-ampo kita: Dios nga gamhanan, manggihatagun sa tanang mga gasa, ibutang sa among mga kasingkasing ang gugma sa imong ngalan, aron nga, pinaagi sa pagpalalom sa diwa sa among pagtahud, imo untang amomahon dinhi kanamo unsa man ugaling ang maayo ug, pinaagi sa imong mainampingong pag-atiman, imong bantayan nga luwas ang imong giamoma. Kini among gipangayo pinaagi sa among Ginoong Jesukristo imong anak, nga buhi ug hari uban kanimo ug sa Espiritu Santo, Diyos nga usa hangtud sa kahangturan.

K: *Amen.*

LITURHIYA SA PULONG

Unang Pagbasa: Jer 20:7-9

L: Pagbasa gikan sa Unang Basahon sa Propeta Jeremias

(Basahon gikan sa Kasulatan)

L: Ang Pulong sa Ginoo.

K: *Salamat sa Dios.*

Komentaryo sa Jer 20:7-9:

Usa kini ka propetikong romansa uban sa Dios. Hugot kayo ang pagkapilit ni Jeremias sa pulong sa Ginoo ug sa iyang misyon. Unsa man gani'y ipasulti niya, iyang isulti; unsa man gani'y ipabuhat niya, iyang gibuhat. Ug unsay iyang naani isip balos? Pagtamay, pagbiay-biay ug pagdumot gikan kanilang naminaw kaniya. Busa, si Jeremias mihukom sa pagdumili sa pagsulti alang sa Ginoo. Apan ang Diyosnong matentalong pagbihag kusog kaayo, ug dili makalikay si Jeremias niini. Siya mao ang nabugatan. Nagdilaab siya gikan sa kinahiladman, gidilaab sa Dios. Kon siya dili mobuto, siya masunog.

Salmo Responsoryo: Ps 63:2, 3-4, 5-6, 8-9

(Basahon gikan sa Kasulatan)

Komentaryo sa Sal 63:

Salmo kini sa pagsalig nga may tulo ka bahin, (a) mahitungod sa kauhaw (b. 2-4), (b) kagutom (b. 5-9) ug (k) mahitungod sa balaanong paghukom (b. 10-12). Ang lawasnon ug materyal nga kasinatian sa kauhaw ug kagutom kusog kaayo ug mibayaw niini ngadto sa pagka-kasinatiang espirituhanon. Adunay pagkakaplag sa Dios diha sa pinaka-halawom nga kasinatian sa tawhanong panginahanglan. Ug ang tubag sa tibuok tawo nga nakakaplag sa kadako sa matinabangong presensya sa Dios mao ang usa ka dayag ug malipayong pagdayeg!

Ikaduhang Pagbasa: Rom 12:1-2

L: Pagbasa gikan sa sulat ni San Pablo ngadto sa mga taga-Roma

(Basahon gikan sa Kasulatan)

L: Ang Pulong sa Ginoo.

K: *Salamat sa Dios.*

Komentaryo sa Rom 12:1-2:

Gisugdan karon ni Pablo ang iyang taas nga awthag bahin sa gawi ug kinaiya sa usa ka Kristiyano, dili isip usa ka tawo apan isip usa ka sakop sa Kristohanong katilingban. Ang lawas sa tawo dili usa lamang ka pirasong butang nga walay pulos, apan mahimo kining ibayaw isip usa ka buhing espirituhanong halad, usa ka lawasnong pagsimba sa Dios. Aron kini mahimo, ang mga Kristiyano kinahanglang dili maglihok sumala sa mga balaod ug mga lagda sa kinaiyahan ug sa mga paagi nga kini gisunod sa imperyo. Hinunua, adunay usa ka mas taas nga matang sa kinabuhi sa tawo ug sa paglungtad alang sa mga Kristiyano: ang usa ka kausaban sa kinabuhi pinasikad sa pagbag-o sa hunahuna ug kasingkasing, nunot sa kabubut-on sa Dios. Ang tawo nag-aninaw sa pagkabalaan sa Dios isip sakop sa Lawas ni Kristo.

Berso sa Aleluya:

L: **Aleluya, aleluya. R: Aleluya, aleluya!** Hinaut nga ang Amahan sa atong Ginoong Jesukristo molamdag sa mga mata sa atong mga kasingkasing, aron kita masayud unsa nga paglaum ang iya sa atong tawag! L: **Aleluya, aleluya.**

Ebanghelyo: Matt 16:21-27

P: Ang Ginoo maanaa kaninyo.

K: *Maanaa usab kanimo.*

P: Ang Santos nga Ebanghelyo sumala ni San Mateo.

K: *Himayaon ikaw, O Ginoo.*

(Basahon gikan sa Kasulatan)

P: Ang Ebanghelyo sa Ginoo.

K: *Daygon Ikaw, O Kristo.*

Komentaryo sa Matt Matt 16:21-27:

Ang komprontasyon ni Jesus batok sa mga tinubdan sa gahum sa Jerusalem nga maoy hinungdan sa pag-antos ug kawad-on sa mga kabus, mga walay alamag ug mga gilapasan karon natakda na. Si Jesus nakahukom na bahin niini. Apan siya mosulod niining maong komprontasyon nga walay hinagiban, gawas lamang sa himan sa gugma ug kamatuoran alang sa mga tawo ug sa pagka-andam mohimaraut sa mga katilingbanong kadautan ug sa pagpasangyaw sa alternatibong mga panalangin sa gingharian nga nadunggan na sa katawhan. Si Jesus, sa ingon, dayag nga nagtagna sa iyang pasyon, kamatayon ug pagkabanhaw uban sa katigson ug kalig-on sa pagtuman sa kabubut-on sa Amahan.

Sa laing bahin, ang kakulang sa pagsabot ni Pedro sa kabubut-on sa Amahan – sa paghigugma nga dili mopatay sa hinigugma - naghimo kaniyang usa ka babag sa matubsanong pag-antos sa Alagad sa Dios ug sa pakigbisog alang sa kalingkawasan sa Anak sa Tawo. Gusto niya ang usa ka

lihok sa kalingkawasan nga gamhanan ug sayon, sumala sa mga tawhanong laraw nga ang tighatag kinahanglang magpadato usa sa iyang kaugalingon sa dili pa siya mohatag sa uban!

Ang sayop nga pagsabot ni Pedro sa misyon ni Jesus naghatag higayon sa pagtin-aw sa kahulugan sa krus ni Jesus. Ang krus ni Jesus dili lamang usa ka bug-at nga karga sa paglimod sa kaugalingon ug pag-antos alang sa personal nga pagkabalaan ug kinaugalingong pag-alagad sa uban. Hinunua, sa mas lawom, mas makaluwas ug mas gawasnong diwa, kini usa ka krus sa inhustisya, pagpanglupig, kawad-on ug pagkauyamot nga daan nang gipas-an sa katawhan subay sa dagan sa tibook kasaysayan sa tawo. Kini gipahamtang kanila sa nagharing pipila nga nagmugna ug nagpadayon sa pagmugna pag-usab sa usa ka katilingbanong sistema nga nagpabug-at sa kabus. Kini mao ang usa ka krus sa pakigbisog alang sa kalingkawasan, hustisya ug kalinaw!

Please help us continue publishing this Missalette with your donation.

Any amount is appreciated no matter how small.

Thank you!

Account Name:
Communication Foundation for Asia
Metrobank V-Mapa, Sta. Mesa,
Manila Branch:
SA# 3306-509-480
BDO Old Sta. Mesa Road, Manila Branch:
SA# 7090-042-836

Please fax deposit slip to 713-2736
We are located at # 4427 Old Sta. Mesa St.,
Sta. Mesa, Manila

Wali: Ang Simbahan sa Kabus, pinaagi sa Gagmayng Simbahanong Katilingban, nag-aninaw sa dalan sa Krus isip Lawas ni Kristo pinaagi sa mainit ug romantikong pakiglambigit sa Dios ug sa bug-os nga pagsinati sa pinakalawom nga panginahanglan sa tawo!

Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahimtang	Mga Puntos para sa Pamalandong/ Panawagan/ Hagit
Ang Simbahan sa Kabus, pinaagi sa Gagmayng Simbahanong Katilingban, nag-aninaw sa dalan sa Krus isip Lawas ni Kristo pinaagi sa mainit ug romantikong pakiglambigit sa Dios ug sa bug-os nga pagsinati sa pinakalawom nga panginahanglan sa tawo!	Unsay may imong giisip nga imong personal nga kasinatian sa pinakalawom nga panginahanglan sa tawo? Unsa may kasinatian sa inyong GSK bahin sa pinakalawom nga panginahanglan sa tawo? Giunsa man nimo ug sa inyong GSK pagtubag niining pinakalawom nga panginahanglan sa tawo?	Ang Lawas ni Kristo, uban sa tanan niyang mga miyembro, gipadilaab gikan sa kinahiladman sa gugma Dios, malipayon nga moulbo aron sa pagsangyaw ug pagpuyo sa pagkabalaan ug pagkahingpit sa Dios pinaagi sa pagpas-an sa krus sa katilingbanong hustisya, pasaylo ug kalingkawasan.

Padayag sa Pagtoo

P: Nagatoo ako...
K: ...Sa Dios ang Amahan ang makagagahum sa tanan, Magbubuhat sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay.

Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

Mga Katilingbanong Pag-ampo

Katilingbanong Pag-ampo

P: Mga igsoon, kitang tanan magmalipayon sa pagdayeg sa atong Amahan sa langit samtang ihalad nato kaniya ang atong mga panginahanglan. Sa matag pag-ampo, kita motubag: Ginoo, padilaaba kami sa imong gugma.

T: Ginoo, padilaaba kami sa imong gugma.

L: Mag-ampo kita alang sa Simbahan: nga isip Simbahan sa Kabus sa tibook kalibutan, siya lig-onon sa Espiritu Santo samtang tinguhaon niyang mosinati sa pinakalawom nga panginahanglan sa tawo, ilabi na sa mga kabus, ug, gipadilaab sa gugma Dios diha nianang kahimtanga, siya mahimong mahigugmaong maminaw sa pulong sa Dios ug moaninaw sa iyang labing epektibong tubag. Mag-ampo kita sa Ginoo.

T: Ginoo, padilaaba kami sa imong gugma.

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug pagdumala sa Simbahan isip katawhan sa Dios: nga, romantikong gilambigit sa Dios, ipadayon unta nila ang pagbansay sa ilang mga propetikong papel sulod sa Simbahan ug sa katilingban pinaagi sa paglimod sa kaugalingon alang sa kawsa sa Krus sa hustisya, kagawasan ug kalinaw. Mag-ampo kita sa Ginoo.

T: Ginoo, padilaaba kami sa imong gugma.

L: Alang sa mga pangulo sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga sila magpadayon sa pagpalambo sa kagawasan sa relihiyon, sa batakang katungod

sa komunikasyon, sa makatarunganon, makapabuhi, ug pangpamilyang suhol sa mga mamumuo, sa ilang katungod sa pag-union ug sa mga boluntaryong pundok ug sa yuta alang sa mga mag-uuma. Mag-ampo kita sa Ginoo.

T: Ginoo, padilaaba kami sa imong gugma.

L: Alang kanatong tanan, mga lumulupyo sa kalibutan ug mga lungsoranon sa langit: nga kita magdinasigay sa usag-usa sa pagtugkad sa mga panginahanglan sa usag-usa, sa hiniusang pagpaminaw sa Pulong sa Dios, ug sa epektibong pagtabang sa usag usa diha sa atong tawhanong mga panginahanglanon, ilabi na ang depresyon tungod sa kamingaw ug kawalay kahulogan sa kinabuhi sa panahon sa pag-uswag sa teknolohiya, sosyal medya, paggamit sa droga, alkohol, hilawas ug mga kalingawan ug hudyaka. Mag-ampo kita sa Ginoo.

T: Ginoo, padilaaba kami sa imong gugma.

L: Alang sa mga hinigugma natong nipanaw na: nga sa kapasayloan sa ilang mga sala, sila makakaplag sa walay katapusang pagpahulay diha sa kasingkasing sa atong Ginoo ug Manluluwas nga si Hesukristo. Mag-ampo kita sa Ginoo.

T: Ginoo, padilaaba kami sa imong gugma.

L: Alang sa atong espesyal nga mga tinguha, diha sa kahilom sa atong kasingkasing. (Hunong) ...Mag-ampo kita sa Ginoo.

T: Ginoo, padilaaba kami sa imong gugma.

P: Ginoong Dios, kini mao ang mga pag-ampo nga among gihalad kanimo karon. Tabangi kami sa among romantikong pakiglambigit kanimo, padilaaba kami pinaagi sa diwa pagtinguha kanimo. Hatagi kami sa gahum sa pagtabang sa matag linalang nga nanginahanglan, sumala sa imong kabubut-on. Kini among gipangayo pinaagi ni Kristo among Ginoo.

T: Amen.

LITURHIYA SA EUKARISTIYA

Paghalad sa mga Gasa

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

K: Daygon ang Dios hangtod sa kahanagturan.

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.

K: Daygon ang Dios hangtod sa kahangturan.

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

K: Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.

Pag-ampo Alang sa Mga Halad

P: Hinaut nga kining sagradong halad, O Ginoo, motugyan kanamo kanunay sa panalangin sa kaluwasan, nga kon unsa man gani ang gisaulog diha sa misteryo kini matuman diha sa gahum. Pinaagi kang Kristo nga among Ginoo.

K: Amen.

Prepasyo

P: Ang Ginoo maanaa kaninyo.

K: Maanaa usab kanimo.

P: Ibayaw ang inyong mga kasingkasing.

K: Amo nang gibayaw ngadto sa Ginoo.

P: Magpasalamat kita sa Ginoong atong Dios.

K: Angay ug matarong.

Kay kami nasayud nga kini imoha sa imong walay kinutubang himaya, nga ikaw mianhi aron sa pagtabang sa mga binuhat nga mamatay pinaagi sa imong pagkabalaan ug gani imong gihulma alang kanamo ang usa ka tambal sa kamatayon mismo, nga ang hinungdan sa among pagkapukan mamahimong mga kasangkapan sa among kaluwasan, pinaagi kang Kristo nga among Ginoo.

Pinaagi kaniya ang panon sa mga Anghel nagdayeg sa imong pagkahalangdon ug nagkalipay sa imong atubangan sa walay

katapusan. Hinaut nga ang among mga tingog, kami naga-ampo, makig-uban sa ilang mga tingog sa usa ka koro sa masadyaong pagdayeg, samtang kami mosinggit:

Santos

K: Santos, Santos, Santos nga Ginoo, Dios sa kagahaman. Puno ang langit ug yuta sa imong himaya. Osana sa kahitas-an. Dayegon ang nagaanhi sa ngalan sa Ginoo. Osana sa kahitas-an.

Pag-ampo sa Eukaristiya

(Human sa konsagrasyon, ang aklamasyon:)

P: Kini ang misteryo sa pagtoo.

K: Gisangyaw namo ang imong Kamatayon, O Ginoo, ug gipadayag namo ang imong Pagkabanhaw hangtud sa imong pagbalik pag-usab.

(Sa pagtapos sa Pag-ampong Eukaristiko, ang pari moingon:)

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

K: Amen.

Rito sa Pangalawat

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

K: Amahan namo, nga anaa sa mga langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon sa langit. Ang kalan-on namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonaa luwasa kami sa dautan.

P: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron,

tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

K: Kay imo man ang gingharian/ ug ang gahom ug ang himaya/ hangtod sa kahangturan.

P: Ginoong JesuCristo, nag-ingon ka sa imong mga Apostoles, “Ang kalinaw ibilin ko kaninyo, ang akong kalinaw ihatag ko kaninyo.” Ayaw tan-awa ang among mga sala, kondili ang pagsalig sa imong Simbahan ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

K: Amen.

P: Ang kalinaw sa Ginoo sa kanunay maanaa kaninyo.

K: Maanaa usab kanimo.

P: Ipakita ta ang atong panag-inigsoonay.

Kordero sa Dios

K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.

Pangalawat

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: Ginoo, dili ako angay nga mokalawat kanimo, apan ipamulong lamang ug mamaayo ako.

Antipona sa Pagpangalawat:

Bulahan ang mga makigdaiton, kay sila pagatawgon nga mga anak sa Dios. Bulahan silang gigukod alang sa katarungan, kay ila ang Gingharian sa Langit.

Pag-ampo Human sa Pangalawat

P: Mag-ampo kita: Gibag-o pinaagi niining pan gikan sa langitnong halad, nangamuyo kami kanimo, Ginoo, nga, isip kalan-on sa gugma, kini magmatuod sa among mga

kasingkasing ug modasig kanamo sa pag-alagad kanimo diha sa among silingan. Pinaagi kang Kristo among Ginoo.

K: Amen.

Katapusang Panalangin:

P: Ang Ginoo maanaa kaninyo.

K: Maanaa usab kanimo.

P: Iduko ang atong mga ulo alang sa panalangin: Hinaut nga ang kahuyang sa imong mga maunungong katawhan mogimok sa imong kaluoy, O Ginoo, kami naga-ampo, ug gantihi ang ilang matinud-anon nga pangamuyo sa imong kalooy, nga ang wala nila damhang takus sa ilang mga maayong buhat, ila untang madawat pinaagi sa imong manggihatagong pasaylo. Pinaagi ni Kristo atong Ginoo.

K: Amen.

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

K: Amen.

Pagpanglakaw

Lakaw ug isangyaw ang Ebanghelyo sa Ginoo.

K: Salamat sa Dios. ■

Ubani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang **gospelbreak.wordpress.com**. o pinagi sa inyong smartphone o tablet i-swipe kini nga QR code.

